

քը... Եկաւ, ժողովեց, այդպէս անուանած, մը-
տաւորականութիւնը, ճառեր արտասանեց,
խոստումներ արաւ — «Էսպէս պիտի լինի, էն-
պէս պիտի լինի»․ յետոյ մի քանի հոգի գնա-
ցինք իր սենեակը, սրանց էլ հայհոյեց, նրանց
էլ հայհոյեց, պատկերաւոր անեկզօտներ պատ-
մելով մինչև առաւօտ... Դուրս եկաւ, որ հե-
րոսը ինքն է․ ինքը ամէն բան վաղուց հասկա-
ցել էր, նախատեսել էր, բայց դու եկ տես, որ
իրեն լսող չկայ:

Մի քանի օր յետոյ յոյների «Սիլօզոսում»
ի պատիւ բանաստեղծին ցերեկոյթ սարքուե-
ցաւ ու մէկը կարդաց Օշականի ճառը: Ձեռա-
դիրը անընթեռնելի էր, քննադատականը սեղմ
եւ անողոք: Մի ժամ տեւեց: Բանաստեղծը կը-
րակի վրայ էր նստած: Պատասխանեց: Պօսեց
անցեալի մասին, ապագայ յոյսերի, նսեմա-
ցաւ, համեստութեան բուրվառներ ճօճեց եւ
այլեւ «Արուստի Տան» մասին խօսք չարաւ:

Այդ օրուանից ի վեր Սիրունին հանգիստ չու-
նի: Պատերազմի ամբողջ շրջանին սենեակի մէջ
փակուած է մնացել, բնական է, այժմ շարժ-
ուելու պահանջ է դրում: Չսպասուած տոկու-
նութիւն եւ յարատելութիւն է դնում: Կուռւմ
է անթիւ, դուրսը մնացած, թշնամիների դէմ,
հաշտեցնում է հակառակորդներին, մի քանի
տղէտ եւ ինքնահաւան դերասանների ամբար-
տաւանութիւնը մեղմացնում է: Երաժիշտների
հետ խօսելու ձեւ է գտել, բանաստեղծների ա-
կանջին ծածուկ բաներ է փսփսում, նկարիչնե-
րին մեծ յոյսեր է ներշնչում, Կովկասից եկած
խմաստակ արուեստագէտներին ներողամիտ
ժպիտներ է բաշխում, բուրժուականների աղուճի
հետ բարեկամական յարաբերութիւններ է մը-
շակում: Մի խօսքով, չտեսնուած բաներ է ա-
նում:

Սակայն, այստեղ եւս ամէն ինչ պանորա-
միկ է, ամէն ինչ ներկայացում է եւ տեսարան:
Ներքին բովանդակութիւնից զուրկ ենք: Փոր-
ձեր եղան միութեան կէտ գտնել՝ ի դուր: Բա-
ւականանում ենք թէյասեղաններով, ցոյցե-
րով, թատերական ներկայացումներով:

Տօնում ենք Մօլիերը: Ընդունելութիւն ենք
անում Շառլ Դիլին: Տօնեցինք նաեւ Դուրեանի
մահուան քսանհինգամեակի տարեդարձը:

Ինչպէս միշտ պատրիարքի ներկայու-

թեամբ, թափօրով, բօյսկաւաններով շրջա-
պատուած:

Լաւ էր:

Տօնը պիտի սկսուէր Դուրեանի գերեզմանի
վրայ․ ուստի, առաւօտ ուշ չմնալու համար,
որոշուեց, որ «Արուստի Տան» կորիզը գիշերէ
Սիլուարում, Պէրպէրեան դպրոցում:

Նկարիչներ, երաժիշտներ, գրականագէտ-
ներ... Պառկեցին դպրոցի մեծ ննջարանում,
մանկութեան օրերը յիշեցին, կատակներ ա-
րին, պատմութիւններ պատմեցին:

Առաւօտ գնացի, դեռ նոր էին հագնուած:
Չարածիճի մէկը, ըստ աւանդական սովորու-
թեան, զգեստները եւ կօշիկները փոխած էր:
Նկարիչ Թէրլէմէզեանը փորձում էր մի շապիկ,
որ փոքր էր․ Սիւնին իր գուլպաներն էր որո-
նում, մէկ ուրիշը իր կօշիկները: Ամէնքը լաւ
տրամադրուած, ծիծաղում եւ կատակախօսու-
թիւններ էին անում:

Յետոյ սկսուեց արարողական մասը: Պատ-
րիարքը եկել էր պատարագ մատուցանելու եւ
եկեղեցին լի էր: Դրօշակներ, պսակներ, երա-
ժշտութիւն, թափօր, եւ փողոցէ փողոց դէպի
գերեզմանը: Շատ ժողովուրդ: Բոլոր սկիւ-
տարցիները այստեղ էին, քաղաքից էլ շատ
մարդ էր եկել: Ճառեր, արտասանութիւններ:

Կէսօրից յետոյ Պերա, Պրտիշանի թատրոն:
Լեփ լեցուն: Մափեր, ոգեւորութիւն: Ճառեր,
արտասանութիւններ:

Գրերի գիւտի տօներից յետոյ չտեսնուած
տեսարաններ:

Յիշեցի խեղճ Չաւարեանին:

Գում Գափուի եկեղեցուց տուն էի վերա-
դարձել Արնաուտքէօյ եւ շտապում էի նորից
քաղաք․ չգիտեմ ո՞ր հանդէսին ներկայ լինելու
համար: Նաւի մէջ հանդիպեցայ Չաւարեանին:
Յուզուած էր, խիստ ջղախնացած: Չարմացայ
եւ խօսք բացի տօների մասին: Սաստիկ գայրա-
ցաւ.

«Տխմարները, հասկանո՞ւմ են ինչ են ա-
նում: Այս ցոյցերին տաճիկները ջարդով մեզ
պիտի պատասխանեն: Այո՛, ես գզում եմ, ես
վստահ եմ, որ ջարդով պիտի պատասխանեն,
երբ առաջին առիթը ներկայանայ... Պատմու-
թիւնը մեզի ոչինչ է սորվեցրել, մենք մեր
պոռոտախօսութեան զոհը պիտի դառնանք»...

Եւ այդպէս ամբողջ ճանապարհի ընթացքին: